

四庫全書

集部

欽定四庫全書

兩宋名賢小集卷二百九十八

宋 陳思 編

元 陳世隆 補

竹莊小稿

胡仲參字希道清源人負才遊京師所與交俱一時知名士嘉定間赴試不售浪跡數年終蹇遇合乃寄情山水以自放詩有竹莊小稿一卷

宮怨

淚粉羞臨寶鑑前  
澹粧爭似舊嬋娟  
一言曾忤君王意  
閒在長門十九年

寄竹院方丈子師

江湖歲月易消磨  
振錫歸來鬢欲皤  
性懶吟編多散逸  
門閒俗客少經過  
虛檐破處懸蛛網  
落葉空中見鳥窠  
一片師心誰會得  
半窓竹影綠婆娑

郊行暮歸

吟罷歸來興欲狂  
重城半掩傍昏黃  
鐘聲搖動山靈答  
月魄未高人影長  
竹葉淺斟杯量窄  
桂花蒲插帽簷香  
不妨竟日酬心賞  
纔到明朝事又忙

偶得

欲問梅花信  
山寒去未能  
靜思天外句  
坐對夜深燈  
戒酒頻添衲  
煎茶旋鑿冰  
月殘霜又落  
無復叩門僧

醜婦吟

君不見漢殿丹青未漫滅  
馬上琵琶向誰說  
又不見華

清舞破霓裳衣凌波竟墮鬼山血從來艷色多累身妾  
貌雖醜心自悅幽閨到老無人知白髮如絲鏡如鐵

晚雨

勃姑鵲舅叫樓西春色陰晴景不齊濃墨四垂收未起  
湖邊一片夕陽低

端午

千年流水去滔滔此日人來弔汨羅江上畫船無買處  
閉門風雨讀離騷

山中作

村居便野性，况復是清秋。  
為愛山間好，因成旬日留。  
林深喧鳥雀，露重滴松楸。  
昨夜新寒入，篝燈覆敝裘。

入京第一程

六載館杭州，重來訪舊遊。  
山中纔過雨，客裏又驚秋。  
嵐氣蒸衣濕，泉聲激石流。  
功名苦行役，羞見渡鶩鷗。

道中早發

未曉催行色，微吟獨據鞍。  
露垂星影濕，月澹水光寒。  
犬

吠知村近雞鳴覺夜殘親闌在何許誰念客衣單

秋晚泛湖

載酒湖邊買小舟水光山色解人愁短籬寂寂菊花晚  
兩岸蕭蕭楊柳秋落日波間收戲鼓暮煙林外出歌樓  
倚闌長嘯西風裏驚起前汀雙白鷗

試後書懷

踏遍天涯路春秋又三文章與時背言語對人慙湖  
海氣何饒山林分未甘閒僧時過我揮麈共元談

夜坐偶成

一字吟難穩  
沉沉夜向闌  
燈明妨短夢  
衣薄犯新寒  
千里家山遠  
三年客路難  
明朝有佳便  
尺紙報平安

送諸葛春卿還里

扁舟分袂出湖濱  
我向吳中君向閩  
自笑吟身猶是客  
却來遠道送行人  
家山會友憑傳語  
旅舍逢詩為拂塵  
天北天南相憶處  
梅花毋惜一枝春

得家書



手剥鱗緘細細看北堂垂白喜平安為憐客裏多霜雪  
寄得衣來正及寒

雪晴泛湖

雪後湖清淺令人心眼開林疎知寺近冰合礙舟回寒  
色欺吟鬢斜陽入酒杯山行已清絕况復是尋梅

春晚見山茶花一枝獨開

茶蘼開盡見山茶血色嬌春帶雨斜莫是今年逢閏月  
東風吹到背時花

山中口占三首

四野平田春水肥  
前山隱隱帶殘暉  
千林晚色無人共  
時有樵翁獨自歸

躑躅花開野色濃  
和風甘雨卧叢叢  
城中只買零枝看  
那似山頭滿樹紅

飯罷呼僮旋煮茶  
碁枰詩卷小生涯  
從今厭踏紅塵路  
多在山間少在家

夜坐即事

午夜空庭寂心閒坐亦忘竹間風動靜雲裏月行藏驚  
鵲出幽樹寒蟬語廢廊甌茶聊當酒清氣入詩腸

題墨梅竹

洗盡丹青料清高絕點埃數竿無韻竹一樹不香梅與  
可今已矣補之安在哉千年好風致喚上筆頭來

聽雨

聽盡燈前細雨聲聲聲總是別離情何時斷得閒煩惱  
一任芭蕉滴到明

夜坐與伯氏葦航對牀閱江湖詩偶成一首

對牀因話弟兄情話到山林世念輕  
几上江湖詩一卷  
窓前燈火夜三更  
茶經未展神先爽  
香片纔燒味較清  
吟罷忽聞樵角動  
石橋霜曉有人行

薄暮

薄暮抱幽獨無言倚小樓  
日沉千樹晚風起  
一天秋  
鑒  
枕團新夢寒衣帶  
舊愁祗因吟太苦  
餘病未全瘳

山行

石磴手難攀林深去復還人行啼鳥外僧住白雲間野  
興平秋水吟魂繞暮山馬頭風作惡潘鬢任闌珊

月夜聽琴效漁父辭

風入古松成節奏泉奔幽磴響琮琤琴中彈意不彈聲  
猛拂朱絃燈焰落細敲玉版夢魂清啼鳥枝上月三更

寒中偶題

烟對紅爐煖香凝繡被溫老天有秋意寒不到朱門

枕上得句寄潛君升

無奈蓬窓雪打聲夢魂纔穩又還驚枕衾如許猶嫌冷  
多少閨閣睡不成

留宿陳氏書齋

因訪吟朋到竹居春寒策策動窓虛幾番好雨偏留客  
一盞清燈共讀書徐孺舊曾親下榻陳遵見說好投車  
與君靜夜評心事萬斛閒愁盡掃除

遊白后山觀音寺

綠陰深處石橋橫纔入山門意便清林下一僧無箇事

時來倚樹聽泉聲

與生上人

久住深山裏相忘物外形  
逢人出好語入定掩殘經  
古字碑成軸名詩榜作屏  
欲知祖師意栢樹在中庭

雨中

愁坐黃昏掩客扉  
風翻霜葉滿庭飛  
孤燈挑到寒更盡  
猶有行人帶雨歸

讀岳鄂王行實

飛鵠來何意英雄此日生山河張膽氣宇宙載風聲一  
片堂中紙千年身後名至今墳上水猶作不平鳴

和林梅臞西淙瀑布圖韻

瀑駛驚風雨危懸峭壁前臨流清客耳入夜攪幽眠旁  
是龍為廟高疑山有仙一塵飛不到長似九秋天

喜郭希范自上庠歸

馬蹄明日是君家千里歸來傍節華幾夜深閨寒寂寂  
有人和淚卜燈花



用伯氏韻東梅臞

楫拙爐前坐夜深寒侵牕戶月西沉冥搜天地無窮趣  
寫盡江湖一片心霜葉落邊添客思梅花瘦處動高吟  
訪居欲問推敲訣擬把清樽共細斟

東竹院孚老

別來旬日許又過一分春因感塵中事空慚物外人吟  
清便境靜語苦見情真近況知何似篇詩得細論

送梅臞還三山

十年湖海上此日值梅兄一見纔傾蓋相逢又問程新  
編聯盡卷清話入詩評從此雲山別因風時寄聲

題雪舟雲心二友吟卷

君詩何所似絕似晚唐詩寫出春雲狀融成白雪詞百  
篇多態度二妙一襟期與我為三友他年題品誰

清明

杯酒濃澆壠上春東風吹起紙灰塵可堪腸斷中原路  
草掩荒丘不見人

寄黃雲心

竹屋少行蹟，閑門春晝長。  
天時半晴濕，人意共炎涼。  
苔蘚侵階綠，茶蘼壓架香。  
冥搜尋杖屨，不爲看花忙。

采桑女

葉滿筐，箱花滿簪。  
低頭微笑出桑陰，  
後來若有秋胡子，  
說與黃金必動心。

過永春縣

距城纔百里，世路更難平。  
碣石唐人墓，桃源晉地名。  
危

誰依嶽勢荒市帶溪聲往日罹兵火頽垣蔓草生

圩田

圩田依澗水入夏未栽禾不是春耕晚山中寒氣多

閨中詞

寫就相思字燈前帶淚看欲緘還未忍少待淚痕乾  
聽盡芭蕉雨愁人夜不眠憑誰將此意為妾到郎邊

早發

早發六七里前途曙未分漁舟依岸立水碓隔溪聞獨

樹支殘月空山半白雲清晨那可駐日出又如焚

無題

露重濕征衣風急翻紗帽山下灌園人倚鋤看馬過

過界首

幾重嶺隔幾重灣路入濛濛煙雨間獨立溪橋重回首

前頭已是劍州山

思家

夜夢到山居回頭千里餘屢傳歸去信不得寄來書小

徑應添笋荒畦欠理蔬  
客程頻得雨田里事何如

漁梁嶺禹廟

古今陳蹟幾興亡  
閩嶺何因祀夏王  
莫是當年平水日  
曾驅魚鼈渡漁梁

陵上釣臺後

身為功名役因思隱者賢  
只行山後路羞過釣臺前

西湖會上和趙靖軒韻

不著人間半點愁  
每於勝處一凭樓  
吟邊只欠林和靖

坐上追思馬少游  
暈臉芙蓉酣薄暮  
低眉楊柳拂新秋  
酒闌拍掌狂歌舞  
自是忘機可狎鷗

秋意

梧葉飄殘客夢驚  
擁衾危坐到天明  
片心除是眉頭識  
萬感都從念腳生  
江上鱸肥銷旅况  
樓前鴈過帶邊聲  
挑燈無語閒商略  
謀國謀家底計成

還趙靖軒吟卷

借得君詩在案頭  
篝燈夜夜看銀鈎  
苦吟暗數秋更盡

何處笛聲人倚樓

重陽

漫浪江湖已十霜，一秋強半又重陽。  
可憐白日渾閒度，偶對黃花覺自傷。  
客舍題詩書感遇，市樓沽酒慰淒涼。  
登高不為酬心賞，直欲凭闌望故鄉。

夜來聞曾性之丘君就二友隔樓吟聲不絕以詩  
東之

月下歸來深閉門，衾寒時倩博山溫。  
隔樓忽聽吟聲苦，



引得清愁入夢魂

問性之病

莫向推敲苦用心  
聞君病裏亦沉吟  
書燈挑盡無人共  
藥鼎煎殘到夜深  
霜後菊花方寂寂  
臘前梅事又駸駸  
相看咫尺如千里  
幾度逢人問信音

過千頃寺訪谷隱老

別久交情澹重來似舊時  
人生雲聚散世事月盈虧  
茶具權行酒禪牀借看詩  
漫天多雪意預約探梅期

性之尋梅歸來有詩因感一絕

處士廬前門徑深僅留佳句與人吟孤山近日無行路  
疎影暗香何處尋

枕上偶成

客樓蕭索抱愁眠雁過聲聲到枕邊念脚動如魚撥刺  
吟身寒似鷺聯拳匣中幸有劉琨劍囊裏猶餘老杜錢  
忽憶西山山下路夜深霜露滴松阡

夾河中有矮道人自住小舟持咒為生人莫不異

之者

道人神貌方雙鬢欲垂肩坐席容三尺浮家住一船  
蒼生憑拂果持鉢信人緣早泊槁梁下蓬頭起白烟

寄嬾庵

天寒日短道路長白雲飛處知吾鄉大江之東渭之北  
念我故人何可忘別來楊柳春依依只今開到梅花香  
扁舟漫浪歸未得京塵海裏安行藏身名未立仰天笑  
牀頭夜夜鳴干將

音

鏘美師物外無寵辱庭前柏樹常蒼

蒼音書鱗羽久不到幾千里外空相望五雲前墜滿室  
光報師之意無以將篇詩濃墨纔淋浪一聲鴈過天際  
翔

偶得

挑燈伴寒夜兀坐竹鑪邊赤脚知吟苦時將山茗煎

和性之見寄韻

牕燭銷殘轉寂寥柴門無復野僧敲偶來枕上吟詩就  
記向心頭欠筆抄鳴竹數聲疑雪片尋梅清夢到山坳

世情雲雨多翻覆誰是江湖耐久交

遊山中

世途平處起波瀾輸與高僧占好山竹塵直為揮俗具  
槿籬虛設掩塵關林泉有分酬清供瓶錫無人伴此閒  
擺脫名韁須早計半生猶得住雲間

寒夜作

生計尚茫茫微吟思故鄉羈愁消不盡寒夜未為長門  
掩梅花月禽翻竹葉霜挑燈裁錦字明發有歸航

讀秦記

萬雉雲邊萬馬屯  
築來直欲障飛塵  
誰知斬木為干者  
只是長城裏面人

雪

凝雲商作雪  
頃刻滿天涯  
片片疎還密  
霏霏整復斜  
映窓疑月影  
著地似楊花  
四望渾同色  
微茫認點鴉

用馮深居韻題莆陽章氏環翠樓

百尺危梯渺海寰  
欄干十二盡青山  
烟光濃淡藏多景

野水周遭匝四環勝地只宜騷客住  
老天未放主人閒  
憑誰說與九仙道方丈移來在此間

書懷呈曾性之

覽鏡歎頭顱梅花一樣臞病因吟後  
有愁到醉邊無心  
事歸梁燕年華過隙駒世途難著脚  
况復是江湖

和伯氏春雨中韻

癡寒脉脉壓晴莎春漸三分景未和  
待得濃陰收拾後  
花邊春色已無多

兩隄楊柳拂新亭怪底遊人懶踏青手撚梨花成小立  
半窓湖水雨冥冥

寄梅曜

別去忽經旬春風閱二分幾番吟對雨獨自暗思君客  
裏加頻病愁邊駭近聞倚闌商不得心自亂於雲

和伯氏包山觀桃花韻


因訪桃花到嶺根御林春色此平分千株未數栽唐觀  
一幅猶堪畫晉源仙在雲門無處覓人行風外有香聞



笙簫隱隱宮城隅立盡黃昏更斷魂

蕭山望城中遺

見說天文變頻占太史臺但云星犯月不料火為災盡  
夜看烟滅逢人問訊來丹心勤戀闕東向極裴回



兩宋名賢小集卷二百九十八

欽定四庫全書

集部

兩宋名賢小集卷

二百九十九至  
三百二

詳校官中書<sub>臣</sub>閔思毅

助教臣常循覆勘

總校官編修<sub>臣</sub>王燕緒

校對官助教<sub>臣</sub>汪錫魁

謄錄監生<sub>臣</sub>朱恩

欽定四庫全書

兩宋名賢小集卷二百九十九

宋陳思編

元陳世隆補

竹所吟稿

徐集孫字義夫建安人理宗時嘗仕於浙好為詩足跡所至輒有題詠於西湖諸勝處尤多每作一詩甫脫稿人即爭購相為傳誦竹所吟稿二卷林可山為

序

古意

彼美山中桐千古生清風  
斲削羅徽弦不費膠漆工  
伊石臺有梅月冷雲空濛  
一彈彈春江遲日春融融  
再彈彈招隱霜未吟樵楓  
三彈彈離騷感慨古道隆  
太羹元酒味旨趣回顓蒙  
世無子期年知音未易逢  
袖手長太息所聽何不同  
所聽非不同舉世鄭衛聲

智果寺觀東坡墨跡參寥泉

煮茗評詩歲月深  
堂堂遺像篆烟沉  
數間老屋關興廢  
一段清名無古今  
碑斷亂雲封字脚  
井昏落葉覆泉心  
斜陽影裏夷猶處  
仰止高風不敢吟

暇日言事二首

雨苔侵徑客來稀  
官事纔閒便掩扉  
歌枕忽生鄉國念  
夢中喜得一番歸

西風落葉滿庭除  
隱几清吟獨撚鬚  
官地莫將私地比  
菊苗也種兩三株

送葉靖送之維揚

竹西亭下路二十四橋迂有志風寒地携家雨雪途杯  
酣看玉蘂索重載湖珠寫就烏絲句無妨寄雁奴

中秋夜雨

兩年客帝畿圓月浸秋輝今夜月圓時風雨打門歸年  
年此桂魄不照今年客明月應團圓只被浮雲隔

觀秋潮

八月西風噓沆瀣長江協候肆澎湃錢唐王氣天所鍾

非為子胥逞靈恠海門三山縹緲青雙練夾岸奔雷霆  
蛟龍鼉鼉匿形影銀濤雪浪翻滄溟踏浪羣兒慣行險  
出沒波心旗閃閃須臾激灩潮信平蕩漾漁舟千萬點  
天低暮靄襲人衣游子興盡各云歸獨有騷翁看不足  
吟到夜月揚清輝

江湖偉觀

昔日山中一小亭重新輪奐轉崢嶸着身梯磴千層上  
到眼江湖兩派明鼎藥丹成仙已去盃泉墨冷水猶清

壽星炯炯無今古長照東南王氣生

聞菴

獨搔短髮坐更深夜雨書窓半欲陰近日病魔詩思澁  
一秋清句付菴吟

對菊

未能籬下學悠然為微官繫日邊造物自憐清俸少  
菊花隨地鑄金錢

同杜北山鄭渭濱湖邊小憩



與朋看落葉捨棹踏湖西  
楚店傳杯酌殘陽索品題  
雲隨坡影動山被柳陰迷  
一點寒鴉過知他何處棲

看梅

歲寒氣味少人知  
一度相逢一度奇  
不受陽和私點化  
慣經風雪冷禁持  
影橫坡老數枝盡  
香沁逋仙兩句詩  
相對依依吟未得  
斜陽歸路不妨遲

公無渡河

公無渡河公無渡河  
公必欲渡意如何  
波濤汹涌何足



畏中原未復一身多爭如平地有風波人心之險險於河

水樂洞

路穿巖竇折羊腸處處亭臺御墨香流水不隨人事去尚餘絲竹舊宮商

玉清宮初陽臺

守藥胎仙去不來空留山頂煉丹臺明眸炯炯初陽在知隔人間幾劫灰

下竺看猿

渴泉飲罷過別枝株守山林得便宜伸手攫拏楚僧巢  
貴遊玩弄如兒嬉膏粱恣欲甚邱壑芭苴賸把實囊索  
本然無物拋乞與縱有腥羶醫無藥勸汝儔侶只依僧  
殘齋剩核亦潔澄切勿自照具人面便爾忘却當初洞  
口呼不應

聞鶴

千年華表竟何榮曾結孤山夙世盟午夜露零和月冷

一聲風靜仰天鳴既歸蕙帳情何怨不上揚州韻更清  
未必湖陰人聽得聽來好爵謾營營

玉泉看金魚

石沼鑿瓊瑤金鱗數百條年深須變化泉潔自逍遙  
網罟難垂手公卿擬上腰龍宮依梵法翻水雨青霄

訪僧不遇

特地辱君選佛場行行踏遍古苔荒不因坐石貪搜句  
何事抽單輟赴堂空榻日移懸錫影別寮風過煮茶香

忙中我為閒來到君本閒人為甚忙

六一泉

惠勤已蛻老歐仙物逐人非井便乾不是坡翁重到此  
此泉安得到今寒

金沙井

修綆垂鉞自汲深水澄沙瑩幾星金分明不與貪泉比  
莫為金沙起利心

乍晴

吟情天遠倚闌干聲歇鳴渠雨乍乾只為吳山住官舍  
却因笋蕨憶家餐燕窠出子春遊嬾燈燼開花夜話殘  
收拾柳綿囊楮被麥秋猶有一番寒

重拜和靖先生墓

秋聲爾許悲懷古若為思菊老泉堪薦山孤草亦萎高  
風留塑鶴殘雨暗荒碑依舊梅千樹無花香似詩

竹閣

昔日孤山像重移閣幾春騷名垂句法遺愛稔邦民雨

剝一碑古風搖萬竹新來遊興感慨誰繼若而人

夜過富春

夜船搖兀當乘槎得與僧俱似出家數幅征帆拋草渡  
一團幽夢繞梅花風傳山縣殘更漏潮練霜江淡月華  
所恨釣臺眠裡過磯邊不及理漁車

清明

春風客裏動經年寂寞松楸入夢邊斗酒誰為寒食奠  
嬾將楊柳插門前

燕子

呢喃不聽一年餘  
又見雙飛向竹廬  
翻笈人間湖海客  
乘來仍占故巢居

訪林可山不值

尋君每自恨遲遲  
及扣巖扃誤所期  
空放山間雲外鶴  
只吟篷底雪中詩  
孤燈歎枕勞頻夢  
樽酒凭欄定幾時  
獨立小橋回首處  
籬邊猶喜見橫枝

促刺詞



促刺復促刺勸織聲轉劇小婦旣雨採桑歸大婦煮雪  
抽絲繹辛勤欲織禦寒衣朝暮惟恐不盈尺織成門外  
迫推租不了輸租仍賣綌婦姑對泣兒號寒更無可補  
兒衣隙帛暖本擬代綌寒賣綌寒來愈無策促刺兮促  
刺兮勸人織兮織何益貯之金屋是何人重重綾錦飭  
珠璧

鷺

素狎沙鷗水國盟一生踪跡任飄零謾誇霜雪精神別

欽定四庫全書

兩宋名賢小集  
卷二百九十九

難洗蝦魚氣習腥點破青山成曉晝飛來紅蓼稱秋汀  
江湖出入風波裡比着胎仙欠典刑

蟬

高蹈槐梢與柳陰爭鳴直到日西沉初無識見偏客喙  
不讀詩書却好吟風露細餐雖足飽山林為計更宜深  
所談幸爾非人事逆耳從來欠賞音

贈相士

好爵糜人見不休更饒君盡許封侯山林朝市心珠相

莫誤平人枉白頭

遺僧楮衾

練從秋水桂華鄉雅稱分供衲子牀一段溫和雲共軟  
十分明潔月爭光吟魂有夢圓春草禪骨無因怯曉霜  
金帳繡衾皆業境此中清趣最深長

可賦軒避暑

萬籟琅玕爽氣浮何妨暫借著詩流世人奔競長為暑  
心地清涼即是秋普供茶瓜醒眊矐自携枕簟足夷猶

欽定四庫全書

兩宋名賢小集  
卷二百九十九

九

從今只有山林好  
浮世炎炎卒未休

客夢

人生總總汨浮榮  
勘破令人厭宦情  
竹屋無時勞結夢  
秋牀何日遂歸畊  
雨侵藥灶莓苔長  
秋遠書臺筆硯清  
漸老鬢毛猶未雪  
此身應及見昇平

夜雨

夜半倏驚覺  
狂風攪秋鳴  
掣雷起迅雷  
驟雨翻盆傾  
逆知造物意  
棼歛萬寶成  
天威不竟夕  
須臾山月明

官舍雙桂

翠葉黃金剪綴成幽香不斷襲人清獨披月色連宵看  
更結秋風來歲盟好夢偏為蜚蚪破吟聲那似蝶飛輕  
紛紛凡卉誰堪數說與寒梅蚤合并

雨中用進退格

秋來天氣半晴陰塊坐山窓一欠伸欲睡却思妨宦業  
怕吟惟恐動鄉心遠書難準衣仍薄清俸無多索慣貧  
箇種關情畦稻熟雨宜時降不宜靈

岳鄂王墓

古木號風抱不平百年忠義日爭明  
墳前人馬空存石何似當時聽用兵

喜鵲寺

鵲巢不見委空枝透徹機關在險時  
自後非無禪可問多因險處怕人窺

訪詩人

得得訪詩仙平湖水接天身輕如鶴羽  
路遠買漁船日

上荷撐蓋春深柳脫綿造門人已出冷漱石山泉

湖庭夜坐

片葉秋風數日程爭如天籟未秋聲  
厭居塵境炎威熾來納虛亭夜氣清  
萬點螢光移醉眼一湖蟾影蕩吟情  
笙歌寂寂重闌掩獨許高僧並臂行

即事

無端梅潦肆鳴渠宮舍蕭條似蹴居  
把酒厭談天下事挑燈頻讀故人書  
吏抄詩爛多訛字僮治食遲少嫩蔬

濁世炎蒸方鬱鬱庭前新草不令除

挽北礪

本分叅禪學吟中透一關清名傳北礪遺像在南山石  
塔人千古烟梯屋數間詩魂何處覓應伴白雲閒

石屋

路僻鳥關關行吟逐字刪偶來游石屋却喜見香山閣  
峭寒雲護巖深野水閒坡仙留墨在姓字有無閒

盃泉



一方石甃溜涓涓偏以盃稱萬古傳名利醉人醲似酒  
誰甘恬澹酌清泉

此君軒

此君瀟洒翠團欒軒扁佳名墨已乾欲識清風千古在  
試將石刻句吟看

湖西納涼

小艇撐過第一橋酌泉橋下擲詩瓢來遊道院分荷供  
擬拉吟僧遣鶴招暮靄直從漁笛起月華高過塔燈遙

且於靜處偷清福  
人海驚塵湧似潮

寄題漱玉

一派潺湲迸石溪  
直疑寒碧練玻璃  
百川流去須歸海  
萬籟喧來有定時  
橋接丹山橫夜月  
柳籠碧草拂晴曦  
吟廬此去雖相近  
爭似閒鷗立渺瀰

兩宋名賢小集卷二百九十九

欽定四庫全書

兩宋名賢小集卷三百

宋 陳思 編

元 陳世隆 補

竹所吟稿

春日訪四聖鄭渭濱

訪舊孤山去桃花觀裡春迎香聞道室借酒酌吟人琴  
操音還古蔬盤味却真斜陽各分散一水隔紅塵

擔上木香

無奈聲聲杜宇頻，木香猶有一分春。  
擔頭分得清看到，却謝尋常過路人。

和趙永巖借宿僧房韻

鷗盟鄉國外，簪盍把題分。  
旅舍嫌紅日，僧房卧白雲。  
茶新翻雪乳，硯古帶潮紋。  
點陟人間事，棲心耳不聞。

中元

今朝逢令節，依舊客殊鄉。  
禪衲全分席，清齋若過堂。  
江

茶浮水色埜菜帶山香  
忽憶三秋菊誰鋤小徑荒

餞吳西疇東歸

吏情寥落若商參誰是如蘭可斷金  
別去社中懷舊友喜來湖上共新吟  
好山爭似居家者冷菊難禁在旅心  
我欲學君歸未得來年竹屋再相尋

習懶

風撼西窓夕照明習成懶散淡無營  
頗諳讀易深知命却怕吟詩浪得名  
款對山僧開月酒旋蒸湖鱗切秋橙

有來歸自江干客為說錢塘潮信平

送庵僧歸山

微官驅我離家山何日歸休得遂閒先隴陰陰松影裡  
春來草草倩師刪

跋竹間僧詩稿

借來香墨本相對坐孤檠句似寒梅好夢從春草生逼  
人禪價重喚我宦情輕一事猶相得此君同此盟

歲律

歲律又侵尋  
桃符句索吟  
經年為客夢  
每日在家心  
眼看山慣愁  
多怯酒深公  
餘惟讀易世  
事保浮沉

趙紫芝墓

晚唐吟派續  
於誰一脉纔  
昌復已而對  
月難招青塚  
魄見梅如揖  
紫芝眉四靈  
人物嗟寥落  
千古風騷意  
俊奇公去遙  
遙誰可法少  
陵終始是吾  
師

落梅

春雨敲花逐  
水流游蜂催  
課未知休生  
來獨冷嫌無  
雪

別去相逢又隔秋  
紫蓆窠窠凝酒恨  
蒼苔點點落詩愁  
黃昏未覺師雄夢  
塞管一聲何處樓

冷泉亭

山遠源深絕市聲  
許由因此隱方成  
一生獨喜枕流好  
萬事何如酌水清  
楚衲洗心滋味淡  
騷人照影剃名輕  
軟紅塵裡渾如醉  
誰識斯泉可濯纓

玉岑

一抹斜陽掛淺林  
細聽山鳥說春心  
千年古寺多奇跡



讀了豐碑看玉岑

觀音泉

巖石留雲裏翠烟古松知歷幾千年淨瓶一滴楊枝水  
湧作巖前大士泉

除夕

一歲驚心忽已除官遊尚自客西湖漫題桃板標茆屋  
旋買梅花插瓦壺俸薄幸無賒酒債官閒却有索詩逋  
明朝萬事從頭起依舊山肩竹樣癯

舟中

厭殺人間名利忙我忘名利只詩狂雅陪雲袖三生語  
分得漁舟半日涼傍水細看鷗鷺浴隔蘆吹過芰荷香  
從容飽遂清遊勝那似家居卧竹房

秋風悲

秋風悲秋風悲秋風悲今落葉飛豪家不識秋風悲  
酒暖熟兒女嬉秋風悲秋風悲秋風悲今隴穞萎田舍  
不識秋風悲腰鎌收刈雞豚肥秋風悲秋風悲秋風悲

分塞角吹戍人不識秋風悲只願封侯不顧死棗紅十  
載忘歸期秋風悲秋風悲秋風最可悲分江流滔滔禾  
黍離離為此悲者其知誰

訪周伯弼後寄

獨坐湖牕水一杯好懷竟日向誰開火雲六月天無夜  
不為先生定不來

書瘦巖僧詩卷後

泛湘游嶽慣風寒怯掛田文半臂衫吐出烟雲冰雪句

山肩莫怪瘦巖巖

休日招李山房杜北山訪渭濱秋浦於孤山即席

用韻

凜凜仙風匝對田徘徊懷古事茫然眼空湖海無塵累  
身在蓬萊有宿緣孤策遍尋儲鶴地偏提自汲煮茶泉  
詩家眷屬通詩譜不枉微官客日邊

有感

華陽暫脫戴朝簪悔被浮雲惹動心世事可驚如雨驟

客懷無限併秋深能歸不似天邊燕怯冷愁聞月下砧  
幾許清高堪自慰官居賴有竹蕭森

舊園覺

雲氣濕香埃門蹊印碧苔金奎今日賜翠輦昔時來  
禪定琴臺廢詩寒石刻鬼萬斯年勝地不敢肆徘徊

清溪

不比江湖汗漫流山林冷淡氣涵秋泠泠一派源頭水  
岸影中間見白鷗

獨坐

老屋蕭條半欲斜，繩床獨坐看蜂衙。  
經年官況渾如客，計日安書已到家。  
策策冷風刪樹葉，絲絲暮雨織簷花。  
夢魂不那歸心切，小圃堪鋤自種瓜。

挽孫花翁

清氣散乾坤，人亡名尚存。  
玉寒埋葛嶺，墨淡慘秦村。  
井菊風號塚，山花月返魂。  
子孫無處覓，吟客酌芳樽。

餞平洲僧

天地一身閒袈裟亂山聽經離竺寺結制去雲間色  
重懸詩稿藤枯帶蘚斑西風落荷葉應又向西還

雲谷

月浸千林萬壑秋聽琴驚起鶴回頭孤雲帶濕藏空谷  
不逐人間富貴浮

北高峰

閒處春光淡逢僧共採蒿曲盤山磴嶮直上塔峰高風  
露侵衣冷江湖送眼豪近年無隱者空負數株桃

靈芝寺

梵宇背湖光  
朱橋度綠楊  
折藤維小艇  
拂石坐幽房  
齋版驚閒鷺  
苔碑卧夕陽  
都人喧鼓吹  
未識此徜徉

跋吳疇東游詩卷

兩袂熏風過  
傳盧鷗盟又結  
向西湖東游  
雙幅雲烟句  
寫出江心雁蕩圖

湖上

不分雨色共晴光  
每攬吟魂夢草塘  
數日不來湖上看



西風次第水蒼茫

借林可山韻餞蘿屋僧

吟卷多題品  
君齋賈島才  
聞風知竹瘦  
載雨過湖來  
交淡盃中水  
儒酸葉底梅  
便辭京口去  
覓取近詩開

抄歲

幾多風月費  
招邀傳舍侵  
尋一載僑客  
久夢魂甘淡泊  
歲寒老態厭  
喧囂情空雪片  
飄梅瓣冷地  
春光上柳條  
世事每從兒  
戲過門前歌舞  
又元宵

聽雪牕

靜擁寒爐逼硯冰  
凍蠅怪有撲窓聲  
拋松撒竹清眠思  
吹滅吟燈坐到明

寄懷坐中社友

自笑初無作更能  
却因作吏遠詩朋  
與君交訊欠逢雁  
知我懷人獨是僧  
客枕夢殘聽夜雨  
鄉心愁絕對秋燈  
何時歲老梅花下  
石鼎分茶共煮冰

黃羽士

閒披鶴氅紫藤冠帶得林泉骨相寒  
落魄一身風雪冷  
飄蓬千里水雲寬  
素餐洗硯抄詩句  
清夜敲鐘上醮壇  
準擬學仙仙遇否  
何年煉就九還丹

寄詩僧

昔日剡溪曾載雪  
君今訪我以晴期  
一庭梅雨何時竟  
吟得詩來舉似誰

惜春

輕寒側側雨絲絲  
獨坐吟窓日較遲  
方此惜春容易老

晚風吹落堊棠梨

酬雲間僧見寄

一從湖上別無處問相知幾夜頻馳夢今朝忽寄詩山  
昏雲過濕院靜鶴歸遲此去秋風近應須動客思

謝林可山序詩

不枉西湖住兩年窮吟活計又成編生平不得春風力  
只與梅花結得緣

送僧之毘陵

無意叢林坐雲飛天四空禪心泡影外客夢櫓聲中勝  
負機何客窮通笑儘工此行應不錯知遇有詩翁

雨作

薰風入斷籬猶自雨淒淒數日無人過終朝共鶴棲雲  
濃山寺失水汎板橋低亦有田堪秣何時得荷犁

為瘦巖僧題西山爽氣

背却殘陽翠欲流一牕長占四時秋逼人風露衣巾脫  
拄笏朝來獨倚樓

紫笑

雨濕晴烘乃破慳  
時間旖旎度簷間  
不知失笑緣何事  
每對薰風自赭顏

客懷

衣袂半埃塵堪嗟  
白髮新古今同逆旅  
湖海未歸人雨霽  
船爭渡花飛鳥怨春  
片雲千里迥日日謾烹鱗

月夜泛湖

買得扁舟載月明  
喜他蕭鼓已歸城  
一襟風露清吟骨

四望湖山見道情  
花港採苓供果飮  
蘋洲擷荇薦杯行  
此歡不許人多得  
破曉西村雞犬鳴

靜中

靜中白日十分遲  
喚起鄉心怯子規  
客味有如杯水淡  
官情肯被一塵縑  
餅儲餘粟緣供鶴  
俸乏零金為買書  
坐久不禁春雨暗  
誰家樓上笛頻吹

午夢

篇詩纔欠急忙償  
似有奚奴督和章  
望斷曉山雲破碎

驚回午夢雨淋浪春光一半歸楊柳花事三分屬海棠  
靜坐小窻人語寂閒聽梁燕語行藏

蝸牛

分岐頭角出於天盤泊委蛇巧並緣到了升高翻墜失  
徒然陰地肆垂涎

末利菊

瑤華細簇翠蘆纖耐得籬邊曉露淹晚節清香猶更好  
雖名末利不趨炎



杜北山同石峯僧來訪

梅花同伴瘦一瘦有誰過歲事那堪晚心期未易多杯  
深和月吸硯冷帶冰磨山暝歸鴉急相分獨奈何

謝偃溪惠索綯

與客敲詩倚古松亂蟬聲裡夕陽春幾年飯顆山頭瘦  
槐葉今朝得飽供

題贈命士

富貴功名世競癡清吟往往不趨時請君多笑公卿命

莫要逢人舉似詩

挽靈隱僧珏月牕

秋月只清輝  
牕明人不歸  
嘔心成宿病  
蛻骨悟前非  
書偈辭禪院  
緘衾寄母闈  
猿啼泉石冷  
客淚為君揮

牧溪上人為作戲墨因賦二首

宿蓆臨流去就輕  
生平慣與爾同盟  
相從奚假歸圖畫  
特盡江湖一段清

右驚

峭壁懸崖隱趣深每來洞口費呼尋  
啼雲嘯月聲難寫只寫山林一片心

右猿

訓里中友人代簡韻

鬢絲冉冉負年華客夢無時不在家  
吟得新詩三百首却慚籬下見黃花

古樂府

郎別二十春未報淮頭捷空房守節心  
羞見雙蝴蝶

滴淚寫顰脂欲寄南雁羣恐傷郎客思封了却還焚  
妾甘奉姑老妾甘育子穉他日盡錦歸願郎無棄置

言事

讀了南華枕曲肱無端客夢冷偏增官將滿去多逃吏  
詩不吟來少寄僧亂葉打窓猶上案斜陽過屋牕窺燈  
孤山在望何時雪問訊梅花策瘦藤

挽李山房

吟譽先君者多埋葛嶺傍幾年千里客一夕九原傷琴

硯遺兒遠棺衾得友償玉樓天上事應有舊山房

鄭渭濱過訪兩社北山諸友繼至惜乎招石峯月  
溪二禪不來

未見南枝與北枝一清誰可話襟期不嫌添客重行酒  
所欠惟僧共說詩竹影因風和雀動水聲帶雨啟鷗疑  
黃昏緊閉寒扉坐自展韋編對伏犧

采蓮曲

朝露濕妾衣暮霞耀妾矚一葉小如瓜去住無拘束兀

棹歌採蓮襲襲薰風足蘆葉映港清捉對鴛鴦浴蓮中  
有苦心欲折手還曲折運恐傷藕藕斷絲難續

菊

寂寂東籬姿淒彼霜露濕不肯出春風俗眼豈相入世  
無陶靖節此趣誰收拾

蘭

澹淡九畹質雅好住山林幽香不求知伯夷叔齊心世  
道不復古紉佩取騷吟

自君之出矣

自君之出矣蛾眉不復掃寶鑑委埃塵玉容為誰好

堅冰

滕六巧呈瑞平白一尺高霜風凜冽生挾夜聲如號冰  
漸條玉筋瓦縫鏡銀膏茆屋頓暴富掩映何奢豪晶光  
動閭里健羨等兒曹此時輕脆資堅為千載牢一旦陽  
明升消泮蔑纖毫奚獨此為然世事亦滔滔

閒賦

梅花白向鬢根生歲月蹉跎事欠成讀過故書溫有味  
借來新絮冷無情未霜山寺昏鐘動欲霽湖亭夕照明  
多少紅塵留滯客可曾歸去力春畊

渡湖

漠漠西湖匝野烟夕陽柳下買歸船關心一紙平安報  
鴈字縱橫寫碧天

官舍亭前古梅尋常開晚歲暮余整歸裝而乃蚤  
花不容自嘿



爭獍古怪虬龍枝著花傳舍賓歲晚往往來來幾番人  
老大相期疑未諼顧我老眼慣相看嗅花嚼蕊當餐飯  
橫斜峭拔耐霜雪肯媚陽和齊婉婉把酒邀月共說詩  
疎影上衣成繾綣朔風吹夢入家山鼓舞倦游客子返  
誰謂花先常歲期澈夜萬葩玉一本花應有心餞我行  
吐芳非為冬日暖我亦逆知此花意孤潔難與俗人混  
似嫌托根富貴場不若棲身山林穩惜乎花又不能言  
一花一心誠懇懇任他世間競酣桃李春花獨與我結

交歲寒遠

秋胡行

五年行邁兮歸遲遲採桑山陰兮奉親慈冰霜自潔兮  
清節持有客遺金兮志不移索有金兮蓋專為母馳心  
悅桑女下車兮入可知庭中見妾兮徒忸怩載思往事  
兮妾心悲恐君不如妾之有節兮言姑已而君不知孝  
兮人道哀妾不死兮欲何為

賦雪

漫天飄瑞壓囂塵一夜西湖幻出銀煎入茶鐺清肺腑  
吟歸詩句與精神糝填鶴跡看旋沒封合梅花認不真  
茅舍竹籬猶富貴長安安得有貧民

兩宋名賢小集卷三百

欽定四庫全書

兩宋名賢小集卷三百一

宋 陳思 編

元 陳世隆 補

檜庭吟稿

葛起耕字君顧丹陽人詩有檜庭吟稿

春懷

過了花朝日漸遲相將又是禁烟時寒留柳葉淒迷處

春在梨花寂寞枝  
牛角橫書孤壯志  
鹿門採藥誤幽期  
自憐白髮成何事  
說與啼鶯未必知

姑蘇懷古

闔廬城下水連天  
故國淒涼思惘然  
堤柳數行垂舞帶  
砌苔幾疊暈歌鈿  
了無麋鹿游臺下  
祇有鳬鷺戲水邊  
往事如今銷歇盡  
斷霞殘照鎖寒烟

記夢

綺寮縹緲敞虛明  
鵲峙鸞停護碧城  
珠蕊一枝春共瘦

玉環雙珮月同明  
曾題洛賦絨新意  
却拊湘絃寄遠情  
十二闌干風細細  
覺來依約記棋聲

湖天霜曉

十里平湖浸曉光  
玉鸞飛舞鏡中央  
也知青女催梳掠  
淡拂鉛華試靚粧

暮春雜興

畫闌目斷楚雲西  
芳草連天客思迷  
家在江南煙雨裏  
落花時節杜鵑啼

紫樾纍纍綴碧桑林塘雨過綠生香  
荆扉晝掩蒼苔寂  
留得芸籤伴日長

閉門花落又春深  
白紵歌殘對晚斟  
惆悵年來心緒惡  
一庭烟草綠沉沉

蘭杜初芳湘水春  
鷓鴣啼處草如茵  
雙魚不寄蘅皋信  
空有燈花入夢頻

燕子聲中日正長  
讀殘書卷亂堆牀  
夢回却愛西窗寂  
閒看松花帶夕陽



雨中夢故山

冥冥細雨濕江城  
掩映書窓翳復明  
倦客一杯愁頓減  
故鄉千里夢初成  
金華洞口羊驚起  
石佛山頭鹿伴行  
石佛故名何日東  
歸溪上路一犁春  
綠帶帶雲耕

疎櫺

寒意沁疎櫺  
閒堦草尚青  
市朝人自醉  
泉石我常醒  
桂寫月標格  
蘭傳秋典刑  
何妨為老伴  
相與兩忘形

初春感舊

又是春生杜若洲  
憑欄回首總闌愁  
雲橫楚峽縈新夢  
月泛吳波憶舊游  
立馬醉題花外驛  
聞鶯笑倚柳邊樓  
如今萬事經心懶  
祇合長歌擬四休

檄雪

銀闕書飛急羽忙  
料應滕六奏虛皇  
要將閭苑蓬壺水  
幻作瓊林玉樹芳  
風約雲邊停鶴馭  
冰清月際舞霓裳  
鳳簫莫品淒涼調  
催老梅花枉斷腸

和蘆洲劉子泉秋懷

雨送秋歸鴈帶霜凝情無處寄詩狂一庭莎草蛩吟老  
萬里梅花鶴夢長德誼可踰鐘鼎貴聖賢不死簡編香  
邇來世道添悲梗不但摧車是太行

贈燕

鎮日雙棲向畫梁有時飛去為誰忙得泥趁暖添芹壘  
掠水因風貼柳塘語重喚回芳草夢舞輕游徧落花香  
五陵年少傷春恨書繫紅絲擬寄將

次子泉韻

一聲鶗鴂又春休  
風簸榆錢滿地流  
燕子不知花落盡  
等閒飛過柳邊樓

月轉庭花玉一闌  
寶釵不卸待郎看  
丁香擬結相思夢  
無奈東風作社寒

東歸

游倦歸來似長卿  
敝廬事事費經營  
掃除塵土虛堂潔  
拂拭窓櫺舊紙明  
徑菊已荒惟草長  
井花少汲覺苔生  
寒衣未辦西風急  
無奈隣家機杼鳴

除夕

爆竹傳聲又歲除  
流年不駐隙中駒  
屠蘇未足斟春酒  
餽飫先教促曉厨  
彩綃戶庭更鬱壘  
歡傳院落競檮蒲  
老來樂事關心懶  
吟對梅花撚斷鬚

秋寓都城次趙君瑞韻

催破橙香薦蠙黃  
快斟新酒潤詩腸  
雁拖暝色橫秋水  
鴉帶寒聲噪夕陽  
萬事莫如花下醉  
百年渾似夢中狂  
登高休負湖山約  
約買扁舟載艷粧

次劉野泉韻

自笑生隨雁影浮幾經楚尾與吳頭塞樓角送關山月  
湘驛砧敲嶽麓秋歲月奔輪如走坂功名求劍記行舟  
即今安得如澠酒與汝同澆萬古愁

安分

淒煙澹靄鎖林扉又是秋光欲暮時蘋葉江湖風剪剪  
桂花庭院雨絲絲世情冷暖盃中酒人事輸贏局上棋  
安分得閒閒最好不須身外強尋思

覽鏡

覽鏡羞看鬢點霜若云勛業更堪傷已甘身向山中老  
安得名留海內香雅志擬聯高士傳倦游慵入少年場  
長吟酒醒憑闌處更聽秋砧答暮蛩

贈烏龍山圓上人

笑把儒冠換墨衣深思富貴有危機叅他龍象知今是  
還了鴛鴦悟昨非開鉢展單隨所寓打包持錫去如飛  
有人若問西來意正要高談為發揮

支頤

氣數推移有盛衰老觀此理獨支頤閱人雲木能千載  
過眼風花只片時名利場中棋變幻是非窠裏浪傾危  
到頭輸與山中叟樂在耕鋤別不知

淚

誰奏琵琶知客歡啼珠泣玉使心酸感時多向英雄灑  
怨別還從粉黛彈每聽已猿愁滴袂莫燒漢燭恐堆盤  
陽關一曲君休唱唱罷人間行路難



小隱

小隱山林習已成  
市朝聲利讓渠爭  
是非每向靜中見  
悔吝多從動處生  
且約蒼官陪竹友  
共邀歡伯訪梅兄  
歲寒心事期相守  
一瞬榮枯任變更

秋夜

城笳吹下暮雲邊  
螢照書帷夜未眠  
游子不堪征袖薄  
西風懶誦擣衣篇

樓上

樓上何人奏玉蕭數聲和月伴春宵斷腸喚起江南夢  
愁絕寒梅酒半銷

宮詞

銀漏疎風透玉屏碧梧枝上兩三更依稀似寫華清恨  
雲冷香銷夢不成

兩宋名賢小集卷三百一

欽定四庫全書

兩宋名賢小集卷三百二

宋 陳 思 編

元 陳世隆 補

竹溪十一稿詩選

林希逸字肅翁號庸齋又號竹溪福清人紹定間進士第四人初為平海軍節度推官淳祐中遷祕書正字景定間擢司農少卿歷中書舍人直寶謨閣卒其

詩文集有竹溪十一稿三十卷又續集三十卷及門  
林式之所編

泊舟漁浦望吳山作

客子孤舟傍曉沙  
隔江人說是京華  
綠山一帶烟籠樹  
中有王侯百萬家

龍灣秋夜

旅泊秋將暮  
行吟夜向中  
獨星明似月  
重露冷於風  
遊歷書何有  
飛揚醉自雄  
時間邊耗近  
憂憤氣填胸

前出塞

信陽作

淮面如江春漲早獵騎夜歸城未鎖邊頭戍將惜官卑  
舉鞭怒指平安火

後出塞

安豐作

紫金山前數尺雪三十六洲明似月夜來衝突人不知  
但見官軍刀帶血

信陽道中次陳守韻

古嶺纔成徑荒林間有家柳眠腰裊娜桑老骨槎牙野

麦三分草出籬一半花挾書來萬里飄泊負生涯

安豐作

塞北悲笳起淮南古木疎風高疑唳鶴水落見游魚俗  
僅傳丹鼎人誰問枕書因吟招隱賦久客自嗟嗟

寄書後作

幾度題書客未還歸鴻節節度鄉關遙知一紙平安字  
慈母燈前閣淚看

寒食

異俗逢鑽燧勞生嘆轉蓬  
茅簷踈柳月草地落花風  
故國邱墳在他鄉祭祀同  
犇馳真左計歸夢海雲東  
陣陣花風送雨寒心隨風  
雨到鄉關遙知松柏山前  
路今日隣人掃墓還

舟泊姑蘇城外

倚郭維孤舟漠漠見煙渚  
水宿野鳥歸夜深鄰人語  
遠客萬斛愁卧聽姑蘇雨

宿西興渡作

古寺鳴鐘罷高林宿鳥忙竹明風弄影荷淨露生香月  
到中天小星過野水長江村人寂寂敗葉響銀牀

臨浦秋夜

野噪寒枝鵲村歸古寺僧傍階閒落葉隔岸數殘燈月  
退頻移席潮高尚倚藤江虛羣籟息人語近漁罾

樂軒先師挽歌詞

十年燈火若為情一日簫笳有底聲惆悵門前舊時路  
白頭扶杖夜深行



網山遺稿樂軒文已矣今無識子雲千載何人按圖問  
犀斜南谷兩荒墳

晦菴南北象山西道學年來入品題可惜六經真脉絡  
紅泉三世兩幽棲

秋閨怨

簾幕低垂夜漏深秋蛩唧唧相悲吟回紋織罷空彈淚  
未必君心似妾心

午齋即事

京庠作

晴窓吟罷風薄清晝永陳編幾廢興適笑心自領青  
精飯何味車笠沸塵境佇立共幽懷虛簷疎竹影

用韻答友人論詩

藝業難精最是詩千差萬別信難知還須倒嶽傾湫手  
却有驚天動地時鳥跡論書方古雅龍媒入畫始權奇  
夷然便欲超平淡此法誰傳我亦疑

與陳同舍飲三元樓

失身杯酒莫追尤爛醉生涯儘自由可倚何須鸚鵡賦

相逢且解驕驕裘今無客入楊雄巷終有人題李白樓  
却笑三閭太憔悴獨醒猶作畔牢愁

癸巳再入京宿璜溪寄二弟

十日離家只四程白雲何處玉融青溪聲颯颯如風雨  
獨對銀燈詠鶴鵠

黃源嶺半見梅作

古嶺森森立萬松一株寒玉笑春風恰如垂釣桐江客  
盡入雲臺劍珮中

有懷

乙未西山先生典貢舉僕卷乃公所定開院未及謁而公病矣

金蓮學士起持衡玉筍門生僅識名一瓣  
心香雙淚眼  
半溪殘月暮雲橫

七夕

七香寶駕靈誰乞  
雙眼金針俗不存  
世態如今機巧徧  
堪將餘技獻天孫

千載

千載祇如此  
回頭跡便陳  
嗟天遺故我  
問月嘆今人  
客

授長生訣僧談不壞身

悼四先生

真洪蔣魏繼淪終天肯憂人國欲空衆口生憎來論學  
諸賢死不解和我良圖已付悲歌外舊恨祇留奏稿中  
擬續八哀才思短剩將雙淚灑松風

讀黃詩

我生所敬涪江翁知翁不獨俄詩工逍遙頗學漆園吏  
下筆縱橫法畧同自言錦機織錦手與寄每有離騷風

內篇外篇手分別冥搜所到真奇絕  
顏頤韓柳追莊騷  
筆意尤工是晚節兩蘇而下秦晁張  
閉門覓句陳履常  
當時姓名比明月文莫如蘇詩則黃  
黥南日月老賓送  
白頭去作宜川夢官樓家乘誰得之  
那知珠玉無散遺  
生前忍苦琢詩句飄泊不憂無死處  
今人更病語太奇  
哀公不遇今猶故

打馬

九折羊腸片紙間  
機心覿面險於山  
是非喻馬一儒墨

得失爭蝸兩觸蠻危似楚兵臨漢塹急如齊客度秦關  
良圖邂逅何分別莫詫爭雄衣錦還

晚遊遣興

積雨多妨喜晚晴幽禽足足傍簷鳴迎風遠岸松聲近  
背日陰池樹影明親有餘年方賴祿國無長策幸渝平  
此生錯料吾猶可只恐風塵未肯清

心王

易言不動工夫密書說惟微體段彰仙漫有方求氣母

禪非無見指心王靈根本要行藏在稿木寧於應感妨  
一語何思千古訓莫言為陸背程張

日用

賴得人間念已灰省身克己問參回事隨緣法安排去  
病向根源點檢來布韃青鞋資嬾散筆牀茶竈恣徘徊  
偷忙不佳提撕着猛可投機亦俊哉

答友人論學

逐字箋來學轉難逢人箇箇說曾顏那知剥落皮毛處



不在流傳口耳間  
禪要自參求  
印可仙須親煉  
待丹還賣花檐上看桃李  
此語吾今憶鶴仙

力學

力學求心苦未安  
蓬窓賴得小盤桓  
醉知叉手矜持易  
過似科頭點檢難  
靜定工夫忙裏試  
和平氣象怒中看  
亨塗失脚人何限  
始信顏回樂一簞

元扃

君從何處叩元扃  
耳學紛紛莫浪聽  
剗盡念頭方近道

掃空注脚始明經見間日富祇塵積涉歷年深似酒醒  
不必但疑禪背理請君細讀信心銘

偶成

佛言法界惟心造仙說還丹要想成到得冰壺秋月處  
輕輕拈出是功名

讀邱報懷王先生作

實齋諱遂  
字去非

當日籌邊事偶蹉追尤未已意云何縱令君寔謀時短  
不道伊川好處多

泊舟箬村有懷老師作

昔去京華此臧舟老師含笑別江頭  
我今重向江頭立  
宿草傷心二十秋

寄林寒齋

此是淵明向上人少年早已謝簪紳  
談優雅號周禪客  
意散宜稱謝道民書數苦無多字數  
歲時但覺兩情親  
寒窓久我煨爐語久辭青鞋擬乞身

丙宿

丁未臘月  
二十四日

玉宇凌空聳金書照夜明  
牆深客竹迸石古伴梅橫  
雲接天章路風傳徽道聲  
非才叨保直愧見壁間名

又絕句

堂虛陡覺暮寒生長樂疎鐘緩轉更對燭已無詞可草  
擁爐時聽鬧皇城

次早喜雪

竹葉初聞似雨聲  
禁林未曉已通明  
朱樓屈曲欄先濕  
紫殿參差瓦欲平  
冰硯筆隨花片起  
風簷慢點蕊珠輕

堂名不枉人間說此際真如玉琢成

入局有懷

戊申

空飡無補負公家此志雖存鬢已華每向客懷紅躑躅  
不貪郎對紫薇花寬心可要流香酒圓夢何須正焙茶  
手板便還丞相去吾儕活計只桑麻

有感

戊申  
三月

少日因貧強覓官于今悔擲釣魚竿宮袍宜似陲屨暖  
廐馬何如款段安準易莫教元尚白奏篇還要炳於丹

得歸須謁嚴陵去夢已先經七里灘

得郡後二首

戊申六月

君王分付為親還班路誼傳忤要官我但得歸他不問  
從來人道乞身難

語翹情知忤要人此心謀國不謀身一麾得請天南去  
出處應堪白老親

登舟喜風頓清秋暑

觸暑登途衆共猜好風誰料逐帆開天公應是憐行客

正忤炎官熱屬來

和後村明皇按樂圖

周昉筆劉工部  
任泉舸日曾見

芙蓉帳暖春覺遲玉笛真人恣荒嬉  
弄權宰相楊與李  
老奴將軍專北司  
延秋門外日未曙  
宮中但教霓裳舞  
薛玉沉醉壽王醒  
天公自擊催花鼓  
錦鷄索鬪金籠疎  
寶馬登牀伶走趨  
只愁海棠睡不足  
肯信漁陽有反書  
青娥阿監髮種種  
海上依然髻斜擁  
遊魂血汗縱得歸  
不伴君王行蜀隴  
周郎此筆妙殊常  
環臺初見惜匆忙

重來把翫轉燭去十年去我春堂堂按圖雅欲談遺事  
西墅無人誰老異少公錦卷長公題共說少公各揮淚

工部後  
村之弟

### 梅花

紛紛塵劫數河沙玉雲風標共幾家可是人間清氣少  
却疑大半作梅花

### 劬農

此禮今於古庶幾龐眉共席意依依兒攜竹笠翁藜杖



主帶朝冠客布衣，飲不盡觴瓢挈去食猶餘。截葉包歸已分鏤，本隨人看聞說今年僻字稀。

憶在

憶在雲深處，身曾侍紫宸。元無講三昧，那得筆千鈞。分賜茶猶在，批依墨尚新。汗顏恩莫報，竊祿謾娛親。

馬和之覓句圖

以下五首題後村畫卷

先生隱几奴煨火，斜插疎枝破瓦尊。鶴夢未回更幾轉，吟時應是月黃昏。

石虎禮僧圖

父子三人  
禮佛澄圖

眼前立是抱橋尸  
悔不湔腸背後兒  
洛度老胡聞血臭

汝雖合爪吾攢眉

洛度見  
本傳

明皇聽笛圖

壽王妃美寧王笛對面  
三郎背老伶却恨馬嵬西去路  
無人吹出雨霖鈴

楊通老移居圖

憶昔移居詩在集  
篇篇好就中語奇絕  
寂是涉與島誰

歟作此圖題以楊通老行行四五人長短各有荷瓢者  
帽且髯席者頭不裹或牧而尚髻或負而似跛孟先衣  
頗寬靈照袖亦拖一兒解持簪一兒纔剪鬢處士獨跨  
驢牛乃背其媪彼羊驅於前彼猶肩於左琴二荻藍雙  
生計亦甚夥應嫌俗子知必住深山可低眉得何句手  
卷豈其稿若逢李十二定復歌飯顚薏似或招讒胡椒  
能惹禍君子哉若人萬物脩於我

石鼎聯句圖

盡意不盡形形勝意不足正如九方臯相馬不相肉此  
筆誰為之繅藉以錦玉一几共三人彌明喜師服賡酬  
夜何其漏箭在銀燭誰知豕腹脹誰作龍頭縮始胡為  
頽頽末胡為屈伏彼既鼻撩天避席徒局束去者俄翩  
然二子睡正熟廢戶問童奴曉雲棲古木質之昌黎篇  
段段皆寔錄用意豈不精或者疑近俗我聞文章家同  
工而異曲或如駿歷險千里在一蹙或寸步不遺句句  
必連屬在詩則樂天在文則永叔畫品恐亦然願言寶

此軸母使歎巧心受嗤於拙目

題江貫道人山水四言

此畫足絹作石  
林簡齋有詩跋

遠山叢叢遠樹濛濛咫尺萬里江行其中短長何岸高  
低何峯彼坻彼澍彼瀑彼洪靖嵐乍豁烟靄葱籠或斷  
或屬且淡且濃爾萃奚寺爾盤奚宮或垣陰翳或梁欹  
空有吠者尻有樵者翁危檣落碇短棹掀蓬往來異趣  
寂動殊容翠幕其庭豈非盧鴻略約而渡豈非龜蒙昔  
我經行雲山萬重若淮南北與江西東亦簑而雨亦帽

而風乃今追惟夢境相從及此開卷恍然昔同誰居作  
者造化論功淹揔其裔熙成是宗聲聞九陛既召而終  
謂彼樹白賈道盡林木如箕子其身皆白識其身窮其然豈然訊之天  
公此名穹壤疇曰不逢

題達磨渡蘆圖

白頭浪中碧眼胡赤脚笑踏鴈啣蘆太平寺主不知我  
觀音後身誰誑渠是身如幻本來空偶然游戲非神通  
當年涉海向震旦扁舟本與高胡同君不見壺邱弟子

御風飛猶有所待  
固笑之又不見橫拋錫杖渡水僧面  
瞻黃檗稱大采此胡法器更奇在何曾  
以此為聖解蕭郎不晤義不留却要時  
人略驚怪異時埋骨寄熊耳萬里西歸  
提隻履忽從菜嶺遇宋雲雅意依然今  
日是此圖誰筆面如活客來却詠凌波  
韞若將底事比渠儂老胡暗中定差殺

郡圃偶題

鄱陽

曲階倚杖行疎影  
柳花度竹粘衣領  
臺根三兩落殘梅

時見幽禽窺野井

正月郡圃偶成

慶朔堂

梅花落盡柳將舒，池水冬深只尺餘。  
亭欠掃除多敗葉，園隨高下長新蔬。  
典刑如在松加愛，意思相關草莫鋤。  
慶朔堂前詩一首，舊碑元是後來書。

范文正公有慶朔堂詩，手植七松，今

存者四

題宋德清詩稿

和陶宋次道之子

詩法如書法，臨摹恐未真。  
寧為禪散聖，莫作婢夫人。  
士



說門中集君留席上珍苦吟應不厭會見軋黃陳

讀剛愍程公祠堂碑作

抗對公何勇留芳泣血編死能名百世生不解千年官  
豈云無長吾誠恥獨全堂堂英烈在遺像舊江邊

晚行鳳遊池邊作治司

為吏長嗟七不堪偷閒時到小池南去來共浴鳬千百  
高下相呼鵲二三春放新紅梅點點霜餘舊綠草毵毵  
雲邊數陣鴉歸後遠樹如山日半含

人世

浮世堪嗤似戲場  
塵編無限記興亡  
百年不了窓明暗  
一覺寧論夜短長  
空谷老天休浩嘆  
今人古月謾相望  
眼前翻覆祇如許  
隱几何妨靜炷香

夜坐

入夜新涼乍滿襟  
簷前花竹弄清陰  
好時好日隨緣住  
非月非風得趣深  
書到七篇偏有味  
詩留千載待知音  
從來一點圓明處  
不是禪心是本心

徐朝奉挽歌詞

薤露曲薤露歌人生如露可奈何如公九十鬢皤皤有  
子百世名不磨排奸直氣貫義娥教忠蜚奏金鑾坡制  
書內出特旨褒魚躍白金緋染袍徑阪之門道日高葵  
藿園中翁共哦諸孫玉立春正和生事以禮踰牲牢公  
從諸仙遊爛柯送車千兩山之阿鴻章伐石質參軻百  
年似此勝人多翁歸如蛻兒悲號團團一散項兮俄門  
人從今廢蓼莪事親無足可奈何事親無足可奈何薤

露曲薤露歌

虧欠

休問閒愁到酒邊眼前虧欠是良緣六王纔畢秦明失  
二寇俱平晉社遷月滿一輪須漸破屋留三瓦莫教全  
誰名缺減人間世雖道胡僧也自賢

自知

學問深功要不疑空談長笑晉人痴渠儂眼縱明如月  
知我何如我自知

郊行即事

野店相依門向背，牧童對語岸東西。  
草枯白見樵成徑，木落紅隨葉入溪。  
色有淺深峯遠近，影無長短樹高低。  
眼前好句閒收拾，歸到書窓却自題。

老樹菌生鋪兔目，斷溪泥濕印牛蹄。  
山僧渡水雙攜履，野客歸村獨杖藜。  
羣鳥爭枝聲上下，孤松夾澗影東西。  
行吟注意搜詩料，欲近前溪路忽迷。

偶題

生涯莫問要如何且卧牛衣醉濁醪仕已何妨三令尹  
是非原是一東坡拾遺兒去看魚筍廷尉門荒設崔羅  
百卉不論紅與紫看花時少葉時多

書懷

寒窓美筆日娛嬉品格高低問孰知古貌古心空自許  
散歌散傳不能奇但叅言句禪差是要入文章錄却癡  
誰道二郎吟可學支頤搖膝笑龜兒

人間逆境似難堪涉歷崎嶇我熟諳早已知非如伯玉

誤令入閨為圖南

寇萊公

二娘子酒何妨醉

坡別集

小厮兒

禪只默忝

臨濟

試問先生緣底樂坐觀寒月照秋潭

### 世味

世味更嘗百念輕眼前何辱又何榮寧教鬼解擲揄汝  
不許人能駕馭卿躍馬卧龍皆夢事焚香弄鏡了餘生  
春殘雨水差沾足却願從今米價平

### 讀程氏遺書

浮生長短夢可見幾英雄不有遺編在應隨落葉空中

宵門外雪一月坐間風似此難傳處能言孰與同

身外

身外榮枯時與命眼前好應古猶今不須指擬文章力

劉禹錫

且要消除人我心

白樂天強健祇添人我心

貧甚可無餐玉法

閒多好和翫殊吟

傳燈錄

春殘任待花饒笑竹几蒲團味

自深

自警

靜退雖知趣味殊終然習氣未令除有無對鏡宜俱遣



夢覺何時解一如得力要須生處熟用工最怕密中疎  
莫教草草匆匆去却恐從前枉讀書

晨興和前韻

分劑元無欠與餘化工最巧是乘除壯懷何必風雲入  
淨念須看露電如元在不妨雄拓落詩成自笑甫狂疎  
新來一事尤堪訝眼已眇昏學草書

晴窓放言

今日與明朝相尋僅頃刻昨日不可追便如千歲隔長

江沙旦潮孤月明又魄真宰良自勞人生况如客錦衣  
豈云華藜羹未為齏俯仰去來今升沉付一啜卯酒六  
七分武成二三策晴窓樂自知一鏡虛中白

甲寅十月十九日有感

當年瑞節慶虹流冷落如今閱幾秋鼓腹遺民猶說說  
攀髯諸老更誰留玉梅枝上春長在金粟堆邊雲止愁  
明皇陵寢在金粟堆邊追記鵲袍陪拜日晚風黃繖望  
杜詩歎陽美人舞劍歌

宸旒

田圃雜咏

疇昔多慚世網牽，收身幸早賦歸田。  
四科人物皆高弟，只學樊遲也自賢。

獨立搔頭曉未梳，喜看童僕理園蔬。  
漢儒不悟真消息，却下簾帷只讀書。

郊迎猶待一番風，主相那能不愧容。  
縱道東還心事白，更須定洛乞明農。

歲計溪南數畝中，但將風雨祝天公。  
人生何必堂厨飯，

米滲藜羹一飽同

雨過高低水地平扶犁野老續歌聲憂時莫問蓑衣識

但看烏犍破曉耕

識語見文公集雜著

輪輿蓋軫及車弓模寫文奇是考工農具因何却疎略

周公於此愧龜蒙

笠澤叢書農具說最工

題詠近稿

拏舟早已向三韓莫放天風解引還九轉黃芽先白雪  
千年翠甌後紅斑碁無盡筭仙猶着性要全空佛未閒

得路不須愁險絕看他脚力盡時山

夢

學道渾無力紛紛夢未休誰呼鷺與寂莫定蝶為周因  
想誠難詰飛揚果自由工夫何處是勤看嬾安牛

溪上謠

溪上行吟山裏應山邊閒步溪間影每因人語識山聲  
却向溪光見人性溪流自漱溪不喧山鳥相呼山愈靜  
野鷄伏卵似養丹睡鴨依蘆如入定人生何必學臞仙

我行自樂疑散聖無人獨賦溪山謠  
山能遠和溪能聽  
夢西軒舊事

南谷霜松老傷哉一窖塵學遷窮有思詩在護無神  
往日同參盡殘年入夢頻遺書誰掛眼衣鉢付何人

雲木相叅歌

溪翁結草傍溪南近山繞屋青如藍  
天垂四野雲到地  
千頃萬頃羅松杉着亭小小寄面勢  
往來萬象窓中含  
有時倚杖日未吐但看雲木朝相參  
蒼蒼古木大百圍

我醉呼雲雲不飛風和萬竅如瑣簾此時此景誰能盡  
既以名亭聊賦之

夢寒齋

故人千載隔幽明昨夜躊躇過數更握手不知為已死

掀髯猶更話無生海山兜率歸何鄉

樂天詩海山不是  
吾歸處歸則須歸

兜率天

漳浦咸陽寤自驚

樂天夢徽之詩漳浦老身擁被  
三度病咸陽宿草八回秋

長吟天未曉滿簷落月淚如傾

戊午與諸友同謁犀斜南谷二師墳作

來往松間不計年學無進趣負師傳侯芭白髮今能幾  
知付他誰守太元

身前枯槁似山僧瓜葛雖存亦強名料得九京還自喜  
但將墳墓付諸生

艾軒先生

為道難言不著書但知日用是根株當筵自昔傾龍象  
嗣法何人識馬駒六學即今皆勦說一齊孤立可長吁  
犀斜南谷窮愁骨仙境能談舊事無



臂痛六言

六十六翁衰久四百四病更多臂用火攻未可心存水  
觀如何

虞監因書自苦龍眠為畫勞功臂痛與渠相似筆端苦  
我非工

列子肘停杯水吳生臂畫圓光此是病魔饒借莫將妙  
手誇張

莊子口義成

逍遙而下是全書漁父諸篇却不如意外形容辭獨至  
句中脉絡字無虛機鋒頗似禪三昧根極祇求性一初  
千古濠梁同會面子真知我我知魚

老子口義成

見徹深微字字精五千言在與誰明事因借喻多成謗  
經不分章況立名數十有三元是一道虛無實始為盈  
蘇云近佛非知老老說長生佛不生

列子口義成

莊列源流本一宗微言妙趣不妨同但知絕跡無行地

莊子齊物語

豈羨輕身可御風二義乖違劉絕識

劉向敘中有二義乖

背不似一

家書之語八篇叅校湛何功

今書八篇張湛所叅校

就中細細為

分別具眼應須許此翁

### 重修考二記口義

千金求得自河間此記尤奇似五官文若聲牙精識少

物窮纖悉辨名難牙

去聲

圍以後圖方見口義於今缺不

完

綱山有傳艾軒所講口義今不全矣

師說幸然無失墜書成只恨鬢凋

殘

讀關尹子

青牛車後抱關翁師已西游道却東著論九篇今獨在

合名一字古無同

九篇皆一字名

不知身老傳誰氏可愛文奇

似考工博大真人莊所敬寥寥千載想宗風

題新稿

少日無端苦學詩倚樓面壁搃成癡斷無子美驚人語  
差似堯天遣興時最上宗風埋沒久新來家數見聞知

吾生恐被師傳誤自比靈雲更不疑

至學

至學元談理最微員門粗細有誰知蛇生弓影心顛倒  
馬覲其聲夢轉移須信風幡元不動能如水鏡却無疵  
咸經四字分明訓截斷懂懂未感時

先師樂軒云貞吉  
悔亡四字今古座

右銘也小象以未感害釋之有感  
有應而後害生未感則無可悔也

物理六言

以鳥養鳥盡性惟蟲能蟲知天萬物與我為一反身樂

莫大焉

羊螳不如魚計鴻鵠豈比鴈謀為問折腰五斗何如散  
髮扁舟

杜鵑前身名字蝴蝶夢境為周至理但觀物化吾心自  
有天遊

醯鷄甕中世界蜘蛛網上天機他心我心壹是大知小  
知俱非

蚯蚓兩頭是性桃花一見不疑了得葛藤三昧却參茶

改諸詩

非魚知魚誰樂夢鹿得鹿誰誣若與子也皆物

莊執而子

我之則愚

關尹子



兩宋名賢小集卷三百二